


# ***U DAVID TUK' U GOLIAT***



***Ixil de Nebaj***

## U DAVID TUK' U GOLIAT

Atik ch'a'o xo'l unq'a aa Israele' tuk' unq'a Filisteoe' na'ytzan. As tu uma'l u q'ii ik'ul tib' chajnaj ti' ib'anat ch'a'o. As atik uma'l u naj xo'l isol unq'a filisteoe' uva' Goliat ib'ii. Nim chit itxakeb' naj ti' unjoltu unq'a uxhchile. Nikat kuxh ixo'visa naj unq'a aa Israele'. As nikat kuxh isik'in tzan naj ti' unq'a aa Israele', ech nikat tal naj ile'



— ¿Ab'iste ex uva' ye' la xo'v ex ti' kuq'osat qib'? Ti'k naj te unq'a isol unq'a as Israele'.

Ye'lik umaj sol xo'l unq'a aa Israele' nik itx'ak tok k'atz u naje, tan nim chit itxakeb' naj. As ech kuxh nikat ib'an naj jun q'ii, ka'viinqil q'ii ib'an naj ti' chajnaj.

Atik uma'l u chelem naj xo'l unq'a aa Israele' uva' David ib'ii. Atik ka'l tatzik naj xo'l isol unq'a aa Israele' tu u ch'a'oe'. As chajpik ve't b'en u Davide' ta'n vib'aale' ti' b'en taq'at kan naj techb'ub'al unq'a tatzike' uva' atik b'en tu u ch'a'oe'.





Tul uva' oon ve't u Davide' katil uva' nik tuchkat u ch'a'oe', as ik'ul tib' naj tuk' unq'a tatzike', tul til b'en naj u naje' uva' Goliat ib'ii uva' mas chit nim itxakeb'e'. Tab'i ve't u Davide' viyol u naje', tan ya'ltik kuxh naj ti' unq'a isol unq'a aa Israele', as nikat iyoq' ve't u naje' u Tiixhe'.



Tul tab'i ve't u Davide' uva' ya'ltik kuxh u naje' uve' Goliat uva' mas chit nim itxakeb'e', as tal ve't u Davide' uva' la b'en itxakb'a' ve't ok tib' naj vatz u naje'.

Tul tab'i unjoltu unq'a isol unq'a aa Israele', tan ye'l umaj unq'a sole' nikat itx'ak tok vatz u naje' uve' Goliat.

Tal ve't u Davide' te u Saúle'. —Xo'vik axh, tan la b'en unq'os vib' tuk u naje' uva' mas chit nim itxakeb'e'. Ti'k u Davide'.



Itzaq'b'e ve't u Saúle' u Davide'. —¡Ye'le! Tan ye' la uch ab'ene' ti' aq'osat eeb' tuk' u naje', tan axh kuxh xaak, as tul b'anol ch'a'o chit u naje' tichelemil. Ti'k u Saúle'.




Tal ve't u Davide' te u Saúle'. —Tul uva' ta' Pap nikat unxee ve't unq'a uncarneroe', as kat b'uuq' unq'a b'alame' ti' itxeyat txoo vunkarneeroe'. As kat untxey ve't u b'alame' kat unjech' ve't itzi' txoo as kat unyatz' ve't txoo. —Ti'k u Davide'.




—Echat kuxh kat unb'an tul uva' kat ul uma't u txoo uva' nim chit ich'ie' ti' txoo as kat unyatz kan txoo. As ta'n kuxh viyak'il u Tiixhe' kat oleb' ve't in ti' txoo. Ech kuxh viyak'il u naje' eche' umaj u txooe' sunvatz, k'uxh nim chit itxakeb' naj. Ti'k u Davide'.





Tal ve't u Davide' unpajte: —A u kub'aal Tiixhe' kat q'alpun in titzi' unq'a txooe'. As echat kuxh tuk iba'n ve't u Tiixhe' sve cheel vatz u Goliath', k'uxh nim chit itxakeb' u naje'.

—Ech tal ve't u ijlenaal ile' te u Davide': —Kuxh b'a.  
Tiixh la lochon axh.



Kat toksa ve't u Saúle' unq'a toksa'me' tetz ch'a'o ti' u  
Davide'. Ye' nikat itx'ol ve't u Davide' ixaane' ta'n u  
toksa'm u Saúle', tan ye' chiianalik te u Davide'.



Ech tal ve't u David ile' te u Saúle': —Ine' vil ye' la untx'ol ve't unxaane' tuk' u oksa'me', tan ye'xh kam chusel sva'n. Ti'k u Davide'.

Kat teesa ve't kan u Davide' u oksa'me' uve' tetz ch'a'o.

B'en ve't u Davide' ti' iq'osat tib' tuk' u Goliath'. Ti' vib'ii u Kub'aal Tiixhe' nikat ik'ujb'a' kat naj ik'u'l. Esti'e' uva' ta'n kuxh uma'l vikarooto naj kat teq'o ve'te' tuk' uma't u tal ija'l tuk' uma't u tal sam.



Tul pal ve't naj tu uma'l u nimla a', uve' atik ku' xo'l unq'a aa Israele' tuk' unq'a aa Filisteoe', as pal isik' u Davide' o'va'l u tal k'ub'e' uva' nurel chit ti'. Taq' ve't ku' naj u k'ub'e' tu tal same'.



U Goliat' uva' maas chit nim itxakeb'e', tul til naj itzaa ve't u Davide'. Xe't ve't naj tze'len. Ech tal ve't naj ile' te u Davide', ¿Ma' in kuxh umaj tal tx'i' b'a savatz? Tan tze' kuxh eq'omal a'n ti' ool svi'. Si'u, jetz'en tzan sunk'atz, as tuk unyatz' ve't kan axh cheel. Tuk vaq' ve't kan vachib'ile' te unq'a tz'ikine' tuk te unq'a txokope' ti' techb'ut txoo vachib'ile'. Ti'k u Goliat'.



Kat sik'in chan ve't b'en u Davide' te u Goliath' uva' nim chit itxakeb'e': —Il axh ile' ta' ool ve't svi' tuk ch'ich', tuk' jutz' vi' ch'ich', pet ech koj in tan tuk' chit vib'ii u Kub'aal Tiixhe' tuk unb'ankat see. Ti'k u Davide'.



Tan tuk iloch in u Kub'aal Tiixhe' cheel tan ine' tuk yatz'on axh, tuk untzok' ve't el vavi'e', aq'al la tootzi ve't unq'a uxhchile skajayil uva' at chit u Kub'aal Tiixhe' ti' unq'a tename' skajayil as chit u Kub'aal Tiixhe' xo'l unq'a aa Israele'. La tootzi ve't unq'a tename' unpajte uva' jit umaj ch'ich' moj umaj jutz' vi' ch'ich' nitxakonsa u Tiixhe' ti' u ch'a'o pet tuk' kuxh viyak'il Aake' niq'alpukat o Aak. Ti'k u Davide'.



Tul kat tab'i ve't u Goliath' viyol u Davide', aal chit kat txakpu ve't ivi' naj ti' u Davide'. Kat tzaa ve't naj ti' iyatz'at ve't u Davide' uve' ni tale', as ti' kuxh viyak'il naje' kat ik'ujb'a' kat ik'ul.





Oora chit kat toksa ve't u Davide' uma'l u tal k'ub' tu u ija'le', as isuti b'en naj ti' u Goliath'. A' chit okkat u k'ub'e' xo'l vipala u Goliath', as yakixh chit pumel ib'en naj tu tx'ava'.

Tul til ve't u Davide' ib'en naj tu tx'ava', oora chit q'ax  
ib'en ve't u Davide'. Ichoj je' tzan naj vich'ich' u  
Goliath' tu u toztotze' as itzok' ve't el u Davide' vivi' u  
Goliath'.



Kat oleb' ve't u Davide' ti' iyatz'at u Goliath', as jit tuk' viyak'il naje', pet tuk' chit viyak'il u Kub'aal Tiixhe' tan ti' uva' k'ujlik chit ik'u'l naj ti' u Kub'aal Tiixhe'.



Tul til ve't u ijlenaale' tuk' unjoltu unq'a sole' kat chit toksa ve't chajnaj iq'ii u Tiixhe'.



Xamtik ve't stuul kat ok ve't u Davide' ijlenaalil xo'l unq'a aa Israele' ta'n u Tiixhe'. Ye' nikat ik'ujb'a' u Davide' ik'u'l ti' viyak'ile', mita'n ti' vitxumb'ale', pet ti' kuxh u Kub'aal Tiixhe' nikat ik'ujb'a' kat ve't naj ik'u'l. Kat taq' ve't tzan u Tiixhe' vib'anile ti' u Davide' tul uva' atik ok naj ijlenaalil ti' unq'a aa Israele'.

Til u Davide' viyak'il u Tiixhe' tuk' vib'a'nil Aake',  
tan kat iloch ve't u Tiixhe' u Davide', as kat ib'itza ve't  
naj uma'l u b'itz, ech ile':

### **B'itz 23**

1. A' u Kub'aal  
Jehovae' u xeeol vetze'.  
Esti'e' uva' ye'xh kam  
kuxh la unya'taj.

2. La taq' ve't in Aak  
i'loj vatz unq'a  
chaq'aalae'. La ixee in  
Aak tzi' unq'a uva' va'l  
kuxh ili'lo'lane'.





3. As la taq' ve't Aak iyak'il u vaanxelale', la teq'o ve't in Aak tu uma'l u jikla b'ey uva' la jikb'a'n vuntxumb'ale', aq'al uva' la ok ve't iq'ii vib'ii Aake'.

4. As k'uxh la xaan in xo'l unq'a vitze uva' atkat vimuu u kamchile', tan ye'l in la xo'v vet in, tan Axhe' ta' Pap svi'. A' vakarote' la k'ujb'a'n unk'u'l.



5. Kat ab'anlu tuch uma'l u meexha sunvatz, vatz unq'a uxhchile' nich'on taama svi'. Kat aaq' ve't ku' uma'l u b'a'nla tz'akab'al ti' unvi', as kat anoosal ve't vunpicheele'.



6. A' chit u b'a'ne' la xekeb' ve't svi' jun q'ii ti' vuntiichajile', as tu Vikab'al u Kub'aal Jehovae' la atinkat in ti' chit ib'ene'.



An chit nikat tal u Davide' tul nikat ichiib'e', tan k'ujlik chit ik'ul ti' u Tiixhe'. Echat kuxh o' unpajte, tan la kuk'ujb'a' kuk'u'l ti' u Tiixhe' eche' kat ib'an u Davide', k'uxh la chiib' ve't u qaanxelale' moj tul la txumun o'. Tan ech u tx'i'la naje' ta' eche' u Goliath', tan b'anel chit tuch ti' iyansat o'.





Tul uva' la tal u tx'i'lanaje' kuyansale' as aal chit la jetz'en ok o' k'atz u Kub'aal Tiixhe', aq'al uva' Aake' la eesan ve't o' tiq'ab' u va'lexhe' sb'enamen.

Asoj la kuk'ujb'a' kuk'u'l ti' viyak'il u Kub'aal Tiixhe', Aake' la lochon o' ti' kutx'akat u va'lexhe'. Esti'e' vitz'in vatzik kunimataj u Jesúse', tan Aake' la sotzsan vapaave'. La teesa ve't o' Aake' tiq'ab' u tx'i'lanaje', as la ikol ve't axh Aaki.

